



亢倉子

全道篇第一

道家三

洪成

亢倉子居羽山之顏三年俗無疵癘而仍穀熟其俗竊相謂曰亢倉子之始來吾鮮然異之今吾日計之不足歲計之有餘其或聖者耶盍相與尸而祝之社而稷之乎亢倉子聞之色有不釋其徒鱉啜從而啓之亢倉子曰吾聞至人尸居環堵之室而百姓猖狂不知其所如往今以羽俗父子竊竊焉將俎豆予我其的之人邪吾是以不釋於老聃之言鱉啜曰不者夫尋常之汙巨魚無所還其體而鯢鱮爲之制步仞之丘巨獸無所隱其

軀而夔狐爲之祥且也尊賢事能嚮善就利自堯舜以固然而况羽俗乎先生其聽矣亢倉子曰噫來夫二子者知乎函車之獸介而離山罔罟制之吞舟之魚蕩而失水螻蟻苦之故鳥獸居欲其高魚鼈居欲其深夫全其形生之人藏其身也亦不厭深眇而已吾語若大亂之本禮乎堯舜之間其終存乎千代之後必有人與相食者矣言未終南子榮之樛色蹇然膝席曰樛年運而長矣將奚以託業以事斯言亢倉子曰全汝形抱汝生无使汝思慮營營若此緒年或可以及此言雖然吾才小不足以化子子胡不南謁吾師聃亢倉子既謝榮之

樛不釋羽俗而龍已乎天下水之性清土者滑之故不得清人之性壽物者滑之故不得壽物也者所以養性也今世之惑者多以性養物則不知輕重也是故聖人之於聲色滋味也利於性則取之害於性則捐之此全性之道也萬人操弓共射一招招無不中萬物章章以害一生生無不傷故聖人之制萬物也全其天也天全則神全矣神全之人不慮而通不謀而當精照无外志凝宇宙德若天地然上爲天子而不驕下爲匹夫而不愠此之謂全道之人心平正不爲外物所誘曰清清而能久則明明而能久則虛虛則道全而居之秦佚死亢

倉子哭之其役曰天下皆死先生何哭爲也亢倉子曰天下皆哭安得不哭其役曰哭者必哀而先生未始哀何也亢倉子曰舉天之下吾无與樂安所取哀蛻地之謂水蛻水之謂氣蛻氣之謂虛蛻虛之謂道虛者道之體靖者道之地理者道之綱識者道之目道所以保神德所以宏量禮所以齊儀物所以養體好質白之物者以黑爲汚好質黑之物者以白爲汚吾又安知天下之正潔汚哉由是不主物之潔汚者矣夫瞽視者以黈爲赤以蒼爲玄吾乃今所謂皂白安知識者不以爲頽黃吾又安知天下之正色哉由是不遁物之色矣夫好貨

甚者不見他物之可好好馬甚者不見他物之可好好書甚者不見他物之可好吾又安知天下之果可好者果可惡者哉由是不見物之可以保戀矣无能滑吾真矣陳懷君柳使其大夫禱行聘於魯叔孫卿私曰吾國有聖人若知之乎陳大夫曰奚以果明其聖叔孫卿曰能廢心而用形陳大夫曰弊邑則小亦有聖人異於所聞曰聖人謂誰陳大夫曰有亢倉子者偏得老聃之道其能用耳視目聽定公聞而異焉使叔孫氏報聘且致亢倉子待以上卿之禮亢倉子至賓于亞寢魯公卑辭以問之亢倉子曰吾能視聽不用耳目非能易耳目之

所用告者過也公曰孰如是寡人增異矣其道若何寡人果願聞之亢倉子曰我體合於心心合於氣氣合於神神合於無其有介然之有唯然之音雖遠際八荒之表邇在眉睫之內來于我者吾必盡知之乃不知爲是我七竅手足之所覺六腑五臟心慮之所知其自知而已矣

用道篇第二

天不可信地不可信人不可信心不可信惟道可信賢主秀士豈知哉昔者桀信天與其禮四海已不勤於道天奪其國以授殷紂亦信天與其禮四海已不襲於道

天奪其國以授周今夫惰農信地實生百穀不力於其道地竊其果稼而荒翳之齊后信人之性酌讓不明於其道舉全境以付人人實鵠義而有其國凡人不修其道隨其心而師之營欲茂滋災疾朋疊戕身損壽心斯害之矣故曰惟道可信天地非道不能悠久蒼生非賢不能靖順庶政非才不能和理夫用道之人不露其用福滋萬物功歸无有神融業茂靈慶悠長知而辨之謂之識知而不辨謂之道識以理人道以安人夫雞辰而作負日任勞流汗灑地夜分僅息農夫之道也俯拾仰取銳意錐撮力思搏精希求利潤賈堅之道也嚙氣谷

神宰思損慮超遙輕舉日精鍊仙高士之道也剽情端
想畢志所事倫揆忘寢謀效位司人臣之道也清心省
念察驗近習務求賢良以安萬姓人主之道也若由是
類之各順序其志度不替塞其業履是謂天下有道導
筋骨則形全剪情欲則神全靖言語則福全克保三全
是謂清賢道德順則鬼神助信義敦則君子合禮義備
則小人懷有識者自是無識者亦自是有道者靜默闇
鈍者亦靜默物固有似是而非似非而是先號後笑始
吉終凶身可親而才不可親才可敬而身不堪敬敬甚
則不親親甚則不敬親之而踈踈之而親恩甚則怨生

愛多則憎至有以速爲貴有以緩爲貴有以直爲貴有以曲爲貴
百事之宜其由甚微不可不知是故智者難之靜則神通窮則意
通貴則語通富則身通理勢然也同道者相愛同藝者相嫉同與
者相愛同取者相嫉同病者相愛同壯者相嫉人情自然也多才
而好謙貧賤而不諂處勞而不爲辱富貴而恭勤可謂有德者也

政道篇第三

人无法以知天以四時寒暑日月星辰之所行知天若
四時寒暑日月星辰之所行當則諸生血氣之類皆得
其處而安其產矣人臣亦無法以知主以主之賞罰爵
祿之所加知主若主之賞罰爵祿之所加宜則親踈遠

近賢不肖皆盡其才力而以為用矣信全則天下安信失則天下危夫百姓勤勞財物殫盡則爭害之心生而不相信矣人不相信由政之不平也政之不平吏之臯也吏之有臯刑賞不齊也刑賞不齊主不勤明也夫主勤明則刑賞一刑賞一則吏奉法吏奉法則政下宣政下宣則人人得其所而交相信矣是知天下不相信者由主不勤明也亢倉子居息壤五年靈王使祭公致筐帛與紉璐曰余末小子否德忝位水旱不時藉為人君何以禳之亢倉子曰水陰沴也陰於國政類刑人事類私旱陽過也陽於國政類德人事類盈楚以為凡遭水

旱天子宜正刑脩德百官宜去私戒盈則以類而消百福曰至矣鄭有胡之封珪戎弓異時失同於荆荆曰必得封珪戎弓不然臨兵于汝鄭君病之駕見亢倉子曰封珪戎弓先君得之于胡綿代功寶傳章翼嗣今荆恃大而曰必得不然臨兵國危矣寡人欲以他封珪戎弓往若之何亢倉子曰君其少安今是楚亦有寶於此飾楚之寶以貫罪於君楚所不能君必致夫真今荆以淺鮮之過而負其威刑申逞不直以耗致與國荆失諸侯於是乎在諸侯聞之將警勸備倫比勤明會同上義固存鄭其為首君姑待之豈必非福於是以胡珪戎弓往

未至郢荆人聞之曰彼用聖人之訓辭吾焉取此以暴
不直於天下而令諸侯實生心焉遽反其賂而益善焉
人之情欲生而惡死欲安而惡危欲榮而惡辱天下之
人得其欲則樂樂則安不得其欲則苦苦則危若人主
放其欲則百吏庶長具展其欲百吏庶長具展其欲則
天下之人貧者竭其力富者竭其財四人失其序皆不
得其欲矣天下之人不得其欲則相與提携保抱逋逃
隱蔽漂流捃采以祈性命吏又從而捕之是故不勝其
危苦因有群聚背叛之心生則國非其國也勿貪戶口
百姓汝走多壯城池百姓汝疲賦歛不中窮者日窮刑

罰且貳價者日價科禁不行國則以傾官吏非才則寬
猛失所宜與百姓爭利則狡詐之心生所以百姓姦而
難知天下難知則上人疑上人疑則下益惑下既惑則
官長勞官長勞則賞不足勸刑不能禁易動而難靖此
由官不得人故也政術至要力於審士士有才行比於
一鄉委之鄉才行比於一縣委之縣才行比於一州委
之州才行比於一國委之國政而後廼能无伏士矣人
有惡戾於鄉者則誨之不改是爲惡戾於縣則撻之不
改是爲惡戾於國則誅之而後廼能无逆節矣誠如是舉
天下之人一一畏懷無有干背諂慢之萌矣此之謂靖

人凡爲天下之務莫大求士士之待求莫善通政通政之善莫若靖人靖人之才蓋以文章考之百無四五以言論考之十或一二以神器靖作態度考之十全八九是皆賢王慶代明識裁擇所能爾也夫下王危世以文章取士則翦巧綺縵益至而正雅素實益藏矣以言論取士則浮挾游飾益來而蹇諤諍直益晦矣以神氣靖作態度取士則外正內邪益尊而清修明實益隱矣若然者賢愈到政愈僻令愈勤人愈亂矣夫天下至大器也帝王至重位也得士則靖失士則亂故人主勞於求賢逸於任使嗚呼守國聚人者其胡可以不事試於士

乎人情失宜主所深恤失宜之大莫痛刑獄夫明達之才將欲聽訟或誘之以詐或脅之以威或開之以情或苦之以戮雖作設權異而必也公平故使天下之人生無所於德死無所於怨夫秉國建吏持刑若此可謂至官至官之世群情和正諸產咸宜愛敬交深上下條固不可搖蕩有類一家苟違順凌逆安得動哉平王返正既宅天邑務求賢良等聞一善憫豫連日左右侍僕累言大臣有賢異者如是踰歲王曰余一人于德不明務求賢異益恐山澤遺逸不舉豈樂聞善以自閉塞哉廼者及媚僕臣累譽權任頗階左右意余孱昧无能斷明

徒唯共和依違浸長自賢敗德莫此爲多不時匡遏就
茲固黨於是棄左右近習三人於市貶庶司尹長五人
曰無令人臣附下罔上持祿阿意天下聞之稱爲齊明
海南之西歸者七國至理之世輿服純素憲令寬簡禁
網踈濶夫輿服純素則人不勝羨憲令寬簡則俗无忌
諱禁網踈濶則易避難犯若人不勝羨則嗜欲希微而
服役樂業矣俗無忌諱則抑閉開舒而歡欣交通矣易
避難犯則好惡分明而貴德知耻矣夫服役樂業之謂
順歡欣交通之謂和貴德知耻之謂正浮墮之人不勝
於順逆節之人不勝於和姦邪之人不勝於正順和正

三者理國之宗也衰末之世輿服文巧憲令襍祈禁網
頗僻夫輿服文巧則流相炎慕憲令襍祈則俗多忌諱
禁網頗僻則莫知所適若流相炎慕則人不忠潔而耻
樸貴華矣俗多忌諱則情志不通而上下膠戾矣莫知
所適則讒虺繁興而衆不懼死矣夫耻樸貴華之謂浮
上下膠戾之謂塞衆不懼死之謂冒真正之士不官於
浮公直之士不官於塞器能之士不官於冒浮塞冒三
者亂國之梯也荆君熊圉問水旱理亂亢倉子曰水旱
由天理亂由人若人事和理雖有水旱無能爲害堯湯
是也故周之秩官云人強勝天若人事壞亂縱無水旱

日益崩離且桀紂之滅豈惟水旱荆君北面遵循稽首
曰天不棄不穀及此言也乃以弘璧十朋爲亢倉子壽
拜爲亞尹曰庶吾國有瘳乎亢倉子不得已中宿微服
違之他邦至理之世山無僞隱市無邪利朝無佞祿國
產問何由得人俗醇樸亢倉子曰政煩苛則人姦僞政
省一則人醇樸夫人俗隨國政之方圓猶蠖屈之於葉
也食黃則身黃食蒼則身蒼曰何爲則人富亢倉子曰
賦歛以時官上清約則人富賦歛無節官上奢縱則人
貧勾粵之斡鏃以精金鷲隼爲之羽以之楛箬則其與
槁樸也無擇及夫蕩寇爭衝覲武決勝加之駭弩之上

則三百步之外不立敵矣蜚景之劍威奪白日氣盛紫
蜺以之剗穫則其與劓刃也無擇及夫凶邪流毒沸渭
不靖加之運掌之上則千里之內不留行矣夫材有分
而用有當所貴善因時而已耳昔者明王聖帝天下和
平萬物茂暢群性得極善因時而勿擾者也近古以來
天下姦邪者衆正直者寡輕薄趨利者多敦方退靜者
鱸姦者出言長於忠言遂使天下之人交相疑害悲夫
作法貴於易避而難犯救弊貴於省事而一令除去豪
橫則官人安刑禁必行則官人不敢務私利而百姓富
刑曰青災肆赦赦不欲數赦數則惡者得計平人生心

而賢良否塞矣人有大爲賊害官吏捕獲因廣條引誣
陷貞良濶遠牽率冀推時序卒蒙赦宥遇賊害者訖無
所快自毒而已由是平人遞生黠計吏勞政酷莫能鎮
止此由數赦之過也夫人之所以惡爲無道不義者爲
其有罰也所以勉爲有道行義者爲其有賞也今無道
不義者赦之而有道行義者被妒而不賞欲人之就善
也不亦難乎世有賢主秀士肯察此論人怨者非不接
人也神怒者非不事神也巧佞甚人愈怨淫祀盛神愈
怒

君道篇第四

始生之者天也養成之者人也能養天之所生而勿撓
之謂之天子天子之動也以全天氣故此官之所以自
立也立官者以全生也今世之惑主多官而反以害生
則失所以爲立官之本矣草鬱則爲腐樹鬱則爲蠹人鬱
則爲病國鬱則百慝並起危亂不禁所謂國鬱者主德
不下宣人欲不上達也是故聖王貴忠臣正士爲其敢
直言而決鬱塞也克已復禮賢良自至君耕后蚕蒼生
自化由是言之則賢良正可待不可求求得非賢也蒼
生正可化不可刑刑行非理也堯舜有爲人主之勤无
爲人主之欲故天下各得濟其欲有爲人主之位无爲

人主之心故天下各得肆其心士有天下人愛之而主不愛者有主獨愛之而天下人不愛者用天下人愛者則天下安用主獨愛者則天下危人主安可以自放其愛憎哉由是重天下者當制其情所謂天下者謂其有萬物也所謂邦國者謂其有人衆也夫國以人爲本人安則國安故憂國之主務求理人之材玉之所以難辨者謂其有怪石也金之所以難辨者謂其有鍤石也今夫以隼翼而被之鷄視不明者正以爲隼明者視之乃鷄也今夫小人多誦經籍方書或學竒技通說而被以青紫章服使愚者聽而視之正爲君子明者聽而視

之乃小人也故人主誠明以言取人理也才取人理也以行取人理也人主不明以言取人亂也才取人亂也以行取人亂也夫聖人之用人也貴耳不聞之功目不見之功口不可道之功而百姓暢然自理矣若人主貴耳聞之功則天下之人運貨逐利而市譽矣貴目見之功則天下之人恢形異藝而爭進矣貴可道之功則天下之人習舌調吻而飾辭矣使天下之人市譽爭進飾辭見達則政敗矣人主皆知鏡之明已也而惡士之明已也鏡之明已也功細士之明已也功大知其細失其大不知類矣於乎人主清心省事人臣恭儉守職

太平立致矣而世或難之吾所不知也若人主方寸之地不明不斷則天地之宜四海之內動植萬類咸失其道矣以耳目取人者官多而政亂以心慮取人者官少而政清是知循理之世務求不可見不可聞之材澆危之世務取可聞可見之材於乎人主豈知哉以耳目取人人皆數效以買譽以心慮取人人皆靜正以勤德吏靜正以勤德則不言而自化吏數效以買譽則刑之而不畏世主豈知哉

臣道篇第五

夫國之將興也朝廷百吏或短或長或醜或美或怡或厲或是或非雖聽其言觀其貌有似不同然察其志徵其心盡於爲國所以剛訐不怨黜退不愕議得其中无違乎理故天不忒其時地不乏其利人不亂其事鬼神開贊蠻夷柔同保合太和萬物化育國之將亡也朝廷百吏姿貌多美顏色諧和詞氣華柔動止詳潤雖觀其貌聽其言有若歡洽然察其志徵其心盡在競位所以聞竒則怪見異必愕狙嫉相蒙遂喪其道故天告災時地生反物人作凶德鬼神間禍戎狄交侵喪亂弘多萬物不化夫不傷貨財姦人朵損官吏而功成政立下阜百姓上滋主德如此者忠賢之臣也若費財煩人危官苟效

一時功利規賞於主不顧過後貽災於國如此者姦臣也至理之世官得人不理之世人得官邾龍視問事君亢倉子曰既策名而臣人者心莫若公貌莫若和言莫若正公不欲露和不欲雜正不欲犯古之清勤爲國脩政今之清勤爲身修名夫爲國脩政者區處條別動得其宜合於大體爲身脩名者區處條別致遠不通拘於小節是知心以道爲主抵事得其所心以事爲主抵物失其所臣居上位不諫下位不公不合贍其祿君不嚴敬大臣不彰信小臣不合官其朝有才者不必忠忠者不必有才臣不患不忠適恐盡忠而主莫之信不患不信適恐信之而莫能事事上等之人得其性則天下理中等之人得其性則天下亂明主用上等之人當委以權宜便事肆其所爲用中等之人則當程課其功示以賞罰

賢道篇第六

賢良所以屢求而不至難進而易退者非爲愛身而不死王事適恐盡忠而主莫之信耳自知有才識之人外恭謹而內無憂其於衆也和正而不狎親之則彌莊踈之則退去而不怨窮厄則以命自寬榮達則以道自正人有視其儀賢也聽其聲賢也徵神課識或負所望夫賢

人其見用也入則諷譽出則龔默職司勤辨居室儉閑
其未見用也藏身於衆藏識於目藏言於口飽食安步
獨善其身貞而不怨智者不疑事識者不疑人有識之
士行危而色不可踈言遜而理不可拔凡謂賢人不自
稱賢効在官政功在事事太平之時上士運其識中士竭
其耐小人輸其力齊有陪子者材可以振國行可以獨
立事父母孝謹鄉黨恭循念居貧無以爲養施信義而
遊者父之矣所如寡合或爲乘時夸毗者所蚩給於是
負杖步足問乎亢倉子曰吾聞至人忘情黎人不事情
存情之曹務其教訓而尊信義焉今不知爲工受不信

爲信信而不見信爲信爲勤慕義爲義義而不自義爲義然則信
義之士常獨厄隨退胡以取貴乎時而教理之所上也亢倉子俯
而循衽仰而謔超然而歌曰時之陽兮信義昌時之默
兮信義伏陽與默昌與伏汨吾無誰私兮羗忽不知其
讀夫運正性以如適而物莫之應者真不行也真且不
行謂之道喪道喪之時上士乃隱隱之爲義有可爲也
莫可爲者也有可用也莫可用者也祭公問賢材何從
而致亢倉子曰賢正可待不可求材慎在求不慎無
若天子靜大臣明刑不避貴澤不隔下則賢人自至而
求用矣賢人用則四海之內明目而視清耳而聽坦心

而無鬱矣天自成地自寧萬物醇化鬼神不能靈故曰
賢正可待不可求若天子勤明大臣和理之求士也則
恢弘方大公直靖人之材至若天子苛察大臣躁急之
求士也則曲心巧應毀方破道之材至若天子疑忌大
臣巧隨之求士也則竒姓異名及媚怪術之材至若天
子自賢大臣固位之求士也則事文逐譽貪濁浮麗之
材至若天子依違大臣回佞之求士也則內忠外僻情
毒言和之材至故曰材慎在求不慎無昔者黃帝得常
仙封鴻鬼容丘商王得伊尹中興得甫申齊桓得甯籍
皆由數君體道邁仁布昭聖武思輯光明寬厚昌正而

衆賢自至而求用非爲簡核而得之也蔡公曰夫子云賢人不求
而自至亦有非賢不求而自至者乎亢倉子曰夫非賢
不求而自至者固衆矣夫天下有道則賢人不求而自
至天下無道則非賢不求而自至人主有道者寡無道
者衆天下賢人少不肖者多是知非賢不求而自至者
多矣蔡公曰賢固濟天下材亦能濟天下俱濟天下賢
與材安取異邪亢倉子曰窘乎哉其間也夫功成事畢不
殉封譽恭退樸儉之謂賢功成事畢榮在祿譽光揚滿
志之謂材賢可以鎮國材亦可以理國所謂鎮者和寧
無爲人不知其力所謂理者勤率其事人知所於德一

賢統衆材則有餘衆材度一賢猶不足如是賢材之殊域有居山林而誼者有在人俗而靜者有誼而正者有靜而邪者凡視察其貌鄙俗而能有賢者萬不有視察其貌端雅而實小人者十而九夫不練其言而知其文不責其儀而審其度不采其譽而知其善不流其毀而斷其實可謂有識者也

訓道篇第七

閔子騫問仲尼道之與孝相去奚若仲尼曰道者自然之妙用孝者人道之至德夫其包運天地發育萬物曲成萬類布丕性壽其功至實而不爲物府不爲事官無

爲功尸捫求視聽莫得而有字之曰道用之於人字之曰孝孝者善事父母之名也夫善事父母敬順爲本意以承之順承顏色無所不至發一言舉一意不敢忘父母營一手措一足不敢忘父母事君不敢不忠朋友不敢不信臨下不敢不敬嚮善不敢不勤雖居獨室之中亦不敢懈其誠此之謂全孝故至誠之至通乎神明光于四海有感必應善事父母之所致也昔者虞舜其大孝矣庶母惑父屢憎害之舜心益恭懼而無怨謀使浚井下土實之于時天休震動神明駿赫導穴而出奉養滋謹由是玄德茂盛爲天下君善事父母之所致也文

王之爲太子也其大孝矣朝夕必至乎寢門之外問寺人曰茲日安否如何曰安太子溫然喜色小不安節太子色憂滿容朝夕食上太子必視寒煖之節食下必知膳羞所進然後退寺人言疾太子肅冠而齋膳宰之饌必敬視之湯液之貢必親嘗之嘗饌善則太子亦能食嘗饌寡太子亦不能飽以至于復初然後亦復初君后有過怡聲以諷君后所愛雖小物必嚴龔是故孝成於身道洽天下雅曰文王陟降在帝左右言文王靜作進退天必贊之故紂不能害夢啓之壽卜世三十卜年七百年所命也善事父母之所致也閔子騫曰善事父母

之道既幸聞矣敢問教子之義仲尼曰凡三王教子必視禮樂樂所以修內禮所以修外禮樂交修則德容發輝于貌故能溫恭而文明夫爲人臣者殺其身有益於君則爲之况利其身以善其君乎是故擇建忠良貞正之士爲之師傅欲其知父子君臣長幼之道夫知爲人子然後可以爲人父知爲人臣然後可以爲人君知事人然後能使人此三王教子之義也閔子騫退而事之於家三年人無間於父母昆弟之言交遊稱其信鄉黨稱其仁宗族稱其弟德行之聲溢于天下此善事父母之所致也齊太子坐清臺之上燕莊侯他高冠嚴色左

帶玉具劔右帶環珮左光照右右光照左太子讀書不
視莊侯他問曰齊國有寶乎太子曰主信臣忠百姓戴
上齊國之寶也莊侯他應聲解劔而去於乎人有偏蔽
終身莫自知已矣賢者見之寬恕而不言小人暴愛而
溢言親戚憐嫉而貳言人有偏蔽惡乎不自知哉是故
君子檢身常若有過衣其衣食其食知其過而不克有
以正之者君子耻之將欲有言識其必不能行者君子
罕言當責衆人之惡者視已善乎哉當責衆人之邪者
視已正乎哉此之謂返明翟西氏之子甚孝謹翟西憐
其子而好妄與之言翟西辰出夕返則曰甲死矣其子

信之既而甲在焉他夕則曰乙且害予其子伺將行仇
既而不見惡端他夕則曰丁病矣其子覘之丁誠無恙
舉此類也冒淹年序子固孝謹至於訓勒益不保承鄉
國之人疾其咎口謀將殺之翟西聞而懼歸以告子子
未甚信既而翟西見殺謂多言之人爲踈露亦有辭約
而不密者謂輕佻之人爲不定亦有體閒而心躁者謂
叢襍之人爲猥細亦有外潔而內濁者若類而引之不
可殫載若非徹識安能洞詳時有不可不應事也者內靜
而外動易動而難靜時有不可不求事也者內思而外待
待至而後樂是故外靜而內動者搖思而損性奔走而

逐利者勞力而害名人生於世或有事不遂志而宣言云不遇時者是無異負丹頸之罪俟時行戮豈不殆哉其有博才通識未見稱用者正可云時非不清命未與耳豈不蹙歎長於諫者務依存前人之性而剪制其情之所由起是以彼此開進親敬殷篤不長於諫者務攻前人之性而闇於情之所來是以彼此嫌貳猜疊日積兒童之所簡者乃耆耄之所非耳目之所娛者乃心慮之所疾徃責天下之愚者已之未賢也徃責天下之迷者已之未明也以未賢責衆愚未賢者以之亡以未明責衆迷未明者以之傷

農道篇第八

人捨本而事末則不一今不一令則不可以守不可以戰人捨本而事末則其產約其產約則輕流徙輕流徙則國家時有災患皆生遠志無復居心人捨本而事末則好智好智則多詐多詐則巧法令巧法令則以是爲非以非爲是古先聖王之所以理人者先務農人農人非徒爲地利也貴行其志也人農則樸樸則易用易用則邊境安安則主位尊人農則童童則少私義少私義則公法立力博深農則其產複其產複則重流散重流散則死其處无二慮是天下爲一心矣天下一心軒皇几遽

之理不是過也古先聖王之所以茂耕織者以爲本教也是故天子躬率諸侯耕籍田大夫士第有功級勸人尊地產也后妃率嬪御絲於郊桑公田勸人力婦教也男子不織而衣婦人不耕而食男女貿功資相爲業此聖王之制也故敬時愛日埒實課功非老不休非疾不息一人勤之十人食之當時之務不興土功不料師旅男不出御女不外嫁以妨農也黃帝曰四時之不可正五穀而已耳夫稼爲之者人也生之者天也養之者地也是以稼之容足耨之容耰耘之容手是謂耕道農攻食王攻噐賈攻貨時事不龔效之以上功是謂大凶凡稼

蚤者先時暮者不及時寒暑不節稼乃多災冬至已後五旬有七日而昌生於是乎始耕事農之道見生而藝生見死而獲死天發時地產財不與人期有年紀土無年紀土無失人時追時而作過時而止老弱之力可使盡起不知時者未至而逆之既往而慕之當其時而薄之此從事之下也夫耨必以旱使地肥而土緩稼欲產於塵土而殖於地堅者慎其種勿使數亦無使踈於其施土無使不足亦無使有餘畎欲深以端畝欲沃以平下得陰上得陽然後盛生立苗有行故速長強弱不相害故速大正其行通其中踈爲冷風則有收而多功率稼

望之有餘就之則疏是地之竊也不除則蕪除之則虛
是事之傷也苗其弱也欲孤其長也欲相與居其熟也
欲相與耘二以為族稼乃多穀凡苗之患不俱生而俱死
是以先生者羨米後生者為糝是故其耨也長其兄而
去其弟樹肥無使扶踈樹境不欲專生而獨居肥而扶
踈則多糝境而獨居則多死不知耨者去其兄而養其
弟不收其粟而收其糝上下不安則稼多死得時之禾
長稠而大穗園粟而薄糠米飽而香舂之易而食之強
失時之禾深芒而小莖穗銳多糝而青蕾得時之黍穗
不芒以長搏米而寡糠失時之黍大本華莖葉膏短穗

得時之稻莖葆長稠穗如馬尾失時之稻纖莖而不滋
厚糠而蓄死得時之麻踈節而色陽堅泉而小本失時
之麻蕃柯短莖岸節而葉蟲得時之菽長莖而短足其
莢二七以為族多枝數節競葉繁實稱之重食之息失
時之菽必長而蔓浮葉虛本踈節而小莢得時之麥長
稠而頸族二七以為行薄翼而蘗色食之使人肥且有
力失時之麥附腫多病弱苗而莢穗是故得時之稼豐
失時之稼約庶穀盡宜從而食之使人四衛變強耳目
聰明凶氣不入身無苛殃善乎孔子之言冬飽則身溫
夏飽則身涼夫溫涼時適則人無病疹人無病疹是疫

瀆不行疫癘不行咸得遂其天年故曰殺者人之天是以與王務農王不務農是棄人也王而棄人將何國哉

兵道篇第九

秦景主將眎強兵於天下使庶長鮑戎必致命亢倉子待以壤邑十二周實迫之亢倉子至自滎泉賓于上館景主三日弗得所問下席北首頓珪曰天果無意恤孤邪亢倉子油然矚眎曰朕以主爲異之問而寧弊弊焉以斫刺爲故抑者亦隨其欲而得正焉無如可矣景主一拜再舉歛黼衽端珪抑首而坐曰實惟天所命亢倉子仰攘而噓俯正顏色曰原兵之所起與始有人俱夫兵

也者出人之威也人之有威性受於天故兵之所自來上矣嘗無少選不用貴賤長少賢愚相與同察兵之兆在心懷恚而未發兵也疾視作色兵也傲言推梭兵也侈鬪攻戰兵也此四者鴻細之爭也未有蚩尤之時人實揭材木以鬪矣黃帝用水火矣共工稱亂矣五帝相與爭矣一興一廢勝者用事夫有以咽藥而死者欲禁天下之醫非也有以祭舟而死者欲禁天下之船非也有以用兵而喪其國者欲禁天下之兵非也夫兵之不可廢譬水火焉善用之則爲福不善用之則爲禍是故怒咎不可偃於家刑罰不可偃於國征伐不可偃於

天下古之聖王有義兵而無偃兵兵誠義以誅暴君而振苦人人之悅也若孝子之見慈親餓隸之遇美食號呼而走之若強弩之射深谷也勝負之決勿徵於他必反人情人之情欲生而惡死欲榮而惡辱死生榮辱之道一則三軍之士可使一心矣凡軍欲其衆也心欲其一也三軍一心則令可使無敵矣古之至兵蓋重令也故其令強者其敵弱其令信者其敵誦先勝之於此則勝之於彼誠若此則敵胡足勝也凡敵人之來也以求利也今來而得死且以走爲利敵皆以走爲利則刃無所與接矣此之謂至兵傲虐姦詐之與義理反也其勢不俱勝不兩立故

義兵入於敵之境則人知所庇矣兵至於國邑之郊不踐果稼不穴丘墓不殘積聚不焚室屋得人虜屋而歸之信與人期以效敵資以章好惡以示逆順若此而猶有悞狠凌宕不聽者雖行武焉可也先發聲出號令曰兵之來也以除人之讎以順天之道故尅其國不屠其人獨誅所誅而已於是舉選秀士賢良而尊封之求見孤疾長老而拯敬之發府庫之財散倉廩之穀不私其物曲加其禮今有人於此能生死人一人則天下之人爭事之矣義兵之生一人亦多矣人孰不悅故義兵至則鄰國之人歸之若流水誅國之人望之如父母行地滋

遠得人滋衆辭未終景主興稽首曰孤獲聞先生教言
不覺氣盈宇宙志知所如也而心滋益龔於是步前稱
觴為亢倉子壽拜居首列師位嚴于齋室又月涉旬辰

加天關白晝行道子行禮

按晁氏曰唐天寶元年詔號亢倉子為洞靈真經然
求其書不獲襄陽王士元取諸子文義類者補其亡
周氏涉筆曰其稱危代以文章取士則剪巧綺濫益
至正指唐事又一鄉一縣一州被青紫章服皆近制
也惟農道一書可讀據二氏則此書唐人所偽矣然
柳子厚唐人乃獨不聞而疑之何與且無其書不應
虛尊為經既尊為經不應鑿空補入是皆有可疑者
至農道篇亦多掇商君書及呂覽語謂云可讀者愚
不審所指也

丁丑夏日誌

亢倉子終

不彙第六冊

